



LUNA DI CONSCIENTISACION DI
CANCER NA PECHO

OCTOBER
2023



ISLA ONLINE

Noticia Transparente di Gobierno

Diabierna 13 October 2023

Email: IslaOnline@gobierno.aw Tel: 528-4952



HUNTO NOS TA
INVENCIBEL.

Famia y amistadnan
ta e fuente di unda nos
ta saca tur nos forza.
Duna sosten durante e
tempo aki por ta un reto
pa nan. Laga nos honra
nan durante cu nan ta
cuida esnan cu ta
pasando den e proceso.

#closethecaregap



OCTOBER

LUNA DI CONSCIENTISACION DI
CANCER NA PECHO

LUNA DI CONSCIENTISACION DI
CANCER NA PECHOOCTOBER
2023Evelyn Wever-Croes
PROME MINISTER

Danki na e union cu semper a reina den comunidad PAIS ARUBA LO SIGUI PADILANTI CU POSITIVISMO, FE Y PERSEVERANCIA

Na final di conferencia di prensa di Gobierno di Aruba, Prome Minister Evelyn Wever-Croes a duna un declaracion di ciere, na unda el a expresa e importancia di ta un pueblo uni, enfatisando cu den bida, no ta tur ora bo ta haya loke bo kier, pero esaki no ta motibo pa give up.

Prome Minister a expresa cu Gobierno di Aruba por ta decepciona di e forma con e negosacionnan a bay, pasobra como pais den Reino, Aruba lo a spera un trato diferente, pero cu apesar di e trato ricibi, pais Aruba no lo kibra.

"Nos comunidad ta consisti di hendenan fuerte, resiliente y uni, cu ta e arma pa yuda e pais sigui bay dilanti. Awe mi ta para aki hunto cu mi colega Minister di partido Raiz, Ursell Arends, pa ilustra e union.

Aruba a enfrenta tanto reto den su historia cortico, pero a sa di enfrenta nan y surpasa nan danki na e union cu semper a reina den comunidad, y e amor cu cada ciudadano tin pa e pida baranca aki. Ban laga e union y amor cu cada un di nos tin pa pais Aruba, determina nos pasonan padilanti. Esaki sigur tabata un experiencia mas, y awor cu mas forza, nos lo sigui padilanti, cu positivismo, cu fe y perseverancia, y nos sa cu nos lo logra", Prome Minister a expresa.





Prome Minister Evelyn Wever-Croes:

PROME MINISTER TA GRADICI SRA MILDRED SCHWENGLE PA REPRESENTA ARUBA COMO STAATSRAAD DEN CONSEHO DI ESTADO DI REINO DESDE 2017

Dialuna ultimo, Prome Minister Evelyn Wever-Croes a reuni cu señora Mildred Schwengle. Manera ta conoci, Gobierno di Aruba na 2017 a nombra señora Mildred Schwengle como Staatsraad, den Consejo di Estado di Reino (Raad van State), pa representa Aruba. Entre otro e trabounan ta consisti di duna conseho riba tratadonan, riba relacion den Reino, riba leyman di Reino (rijks wetten), na momento cu e partidonan den Reino no por yega na otro, y tambe na momento di trata supervision financiero.

Señora Schwengle a expresa di ta sumamente honra, di a wordo nombra como representante di Aruba den un posicion asina importante, y cu e nombracion aki ta e honor di mas grandi den su bida profesional. Tambe, el a indica cu e ta hopi agradeci pa e bunita combersacionnan cu semper e tabata tin cu Prome Minister, y e oportunidad di a traha di cerca cu ne den un bon ambiente. Tambe e ta gradici, Gobierno di Aruba, Parlamento, tur su coleganan, y tur otro instancia, pa e sosten brinda na su persona den e ultimo añanan.



Prome Minister Evelyn Wever-Croes ta gradici señora Schwengle pa e bon trabou cu el a eherce durante tur su añanan den e posicion di Staatsraad, representando Aruba dignamente den Consejo di Estado di Reino, y ta dese’e hopi exito den futuro.

LUNA DI CONSCIENTISACION DI
CANCER NA PECHOOCTOBER
2023Endy Croes
MINISTER

PUEBLO DI ARUBA TA CORDIALMENTE INVITA PA BIN APOYA SELECCION DI ARUBA DEN CONCACAF NATIONS LEAGUE

**Diasabra, 14 di october 2023, 3 or di atardi, Aruba ta
enfrenta US Virgin Islands na cas**

Diahuebs atardi, Minister Endy Croes hunto Minister President Evelyn Wever – Croes y Parlamentarionan; Sr. Hendrik Tevreden, Sra. Shailiny Tromp - Lee, Sra. Darlaine Guedez - Erasmus, Sr. Ricky Hoek y Sra. Setty Christiaans – Yarzagary a haci un bishita oficial na Compleho Deportivo Guillermo Prospero Trinidad y a presencia entrenamiento di nos Seleccion Masculino. Seleccion di Aruba ta preparando pa hunga su “home games” na cas despues di shete aña.

Minister Endy Croes a indica cu e stadion ta den pleno renobacion y no ta cla ainda, pero FIFA a aproba e yerbe artificial y a haci algun excepcion pa e weganan clasificatorio di CONCACAF Nations League tuma luga na stadion Dakota despues di sheta (7) aña. Desde aña 2016, e stadion tabata desapropa pa FIFA y Aruba no por a hunga weganan clasificatorio na cas y mester a bay den exterior pa haci esaki. Pues, e mandatario di Deporte ta invita Pueblo di Aruba pa bin apoya Seleccion Masculino di Aruba den CONCACAF Nations League, diasabra, 14 di october 2023 na Compleho Deportivo Guillermo Prospero Trinidad na Dakota pa 3 or di atardi. Despues di shete (7) aña Aruba por bay disfruta y apoya



Seleccion di Aruba na cas atrobe, den un stadion cu ta cumpliendo cu tur standard internacional pa FIFA. Pa finalisa, Minister Endy Croes ta desea Seleccion di Aruba hopi exito den CONCACAF Nations League. Cu disciplina, deseo, dedicacion y determinacion ta logra.

**October ta luna di conscientisacion di
cancer na pecho.**

**Laga nos uni pa comparti conocimiento,
sosten y speransa.**



Recientemente e entrepreneur Arubiano den produccion di biña Hubert Yarzagaray a haci un viahe di estudio na e region di Treviso na Italia. E biahe aki a keda realisa door di cooperacion entre e embahada di Italia na Hulanda y Gabinete di Minister Plenipotenciario na Hulanda.

Durante tres dia Hubert Yarzagaray a bishita diferente localidad cu ta produci biña. Asina ela haya un presentacion di Consorzio di Tutela della DOC Prosecco, unda a enfoca riba e origen di e biña prosecco, tipo y estilo di prosecco.

Na Villa Sandi e presentacion a mostra riba e mixto di tradicion y innovacion den produccion di biña, unda ta haci uso di practicanan sostenibel. Villa Sandi ta propietario di e famia Moretti Polegato.

Un otro dia sr. Yarzagaray a bishita Giusti Wines cu ta un productor di biña prosecco cu ta basa riba desaroyanan sostenibel sea esaki ta social, economico of medio ambiental. E programa a termina cu un bishita na Cantina Pizzolato, un productor di biña organico desde 1991.

Minister Plenipotenciario mr. Ady Thijsen a bisa di ta contento pa mira cu e biahe aki tabata exitoso.

‘Esaki ta un di e pasonan concreto cu nos por a logra cu embahada di Italia. Mi ta hopi agradecido na e cooperacion cu nan a brinda pa haci e biahe aki posibel y cu e oportunidad pa un entrepreneur di Aruba engrandese su conocimiento riba e tereno di biña na e pais productor di biña mas grandi di mundo,’ asina Minister Thijsen a declara.



**HUNTO NOS TA
INVENCIBEL.**

Den cada lucha contra cancer,
tin heroenan berdadero - e cuidadornan.

**Cu dedicacion incansabel y amor
infinito, nan ta brinda e sosten esencial
cu ta duna pashentnan e forza pa lucha
cu curashi.**

**Cuidadornan no ta ofrece solamente
cuido fisico, sino tambe forza emocional,
alumbrando e momentonan mas scur,
cu speransa y compacion.**

**Laga nos honra e cuidadornan aki,
pasobra nan ta e berdadero pilar di
inspiracion den e lucha contra cancer.
Nan ta recorda nos cu amor y union por
triunfa hasta den e retonan mas disficil.
Hunto nos ta invencibel.**